

- D.* Aut hic ad veteres fagos cum Daphnidis arcum  
 fregisti et calamos: quae tu, perverse Menalca,  
 et cum vidisti puero donata, dolebas,  
 et si non aliqua nocuisses, mortuus esses. 15
- M.* Quid domini faciant, audent cum talia fures?  
 non ego te vidi Damonis, pessime, caprum  
 excipere insidiis multum latrante Lycisca?  
 et cum clamarem 'quo nunc se proripit ille?  
 Tityre, coge pecus,' tu post carecta latebas. 20
- D.* An mihi cantando victus non redderet ille,  
 quem mea carminibus meruisset fistula caprum?  
 si nescis, meus ille caper fuit; et mihi Damon  
 ipse fatebatur; sed reddere posse negabat.
- M.* Cantando tu illum? aut umquam tibi fistula cera 25  
 iuncta fuit? non tu in triviis, indocte, solebas  
 stridenti miserum stipula disperdere carmen?
- D.* Vis ergo inter nos quid possit uterque vicissim  
 experiamur? ego hanc vitulam (ne forte recuses,  
 bis venit ad mulctram, binos alit ubere fetus) 30  
 depono: tu dic mecum quo pignore certes.
- M.* De grege non ausim quicquam deponere tecum:  
 est mihi namque domi pater, est iniusta noverca;  
 bisque die numerant ambo pecus, alter et haedos.  
 verum, id quod multo tute ipse fatebere maius 35  
 (insanire libet quoniam tibi), pocula ponam  
 fagina, caelatum divini opus Alcimedontis,  
 lenta quibus torno facili superaddita vitis  
 diffusos hedera vestit pallente corymbos.  
 in medio duo signa, Conon, et—quis fuit alter, 40  
 descripsit radio totum qui gentibus orbem,  
 tempora quae messor, quae curvus arator haberet?

12-26 *PR*; 27-42 *PRV*      16 *facient*  $\gamma^2\pi$       26 *vincta* *R\gamma bc*  
 38 *facili*  $\gamma\pi$  *Canonicianus, agnoscit Serv.:* *facti P:* *facilis Vb<sup>1</sup>c<sup>1</sup> Donatus*  
*schol. Bern.:* *fragilis Ra<sup>1</sup>*